



La squadra rumantscha curt avant il giu dal venderdi passà encunter l'equipa dals Ladins dal Tirol da sid.

## Saut cun e senza balla

L'Uniun cultura ballape rumantsch ha envidà duas delegaziuns da minoritads ad in turnier a Schluein

■ (anr/ac) Els han giugà ballape e giudi la cumpagnia tranter auter sin la piazza da ballape Crap Gries a Schluein. Las participantas ed ils participants a la turnierada la fin da l'emna passada. Ina scuntrada organisada da l'Uniun cultura ballape rumantsch en regurdanza a l'emprima Europeada d'avant diesch onns en Surselva ed a l'existenza da tschintg onns da l'uniun.

Il trenader da l'equipa rumantscha, *Eros Bonolini*, ha prognostitgà curt avant il giu in stretg resultat il venderdi passà sin la piazza da ballape Crap Gries a Schluein cunter l'equipa dals Ladins dal Tirol dal sid. Ed el ha gi raschun cun sia prognosa. Il giu è vegnì decidì cun shtar penaltis a favur da sia equipa suenter che la partida è stada terminada entaifer il temp da giugar 2 a 2 pari. L'equipa da las dunas rumantschas trenada da *Patrick Haltinger* ha demussà in pau dapli fadia cunter l'equipa da las Sorbas. La partida è ida a fin cun in tschintg a nulla a favur da las Sorbas. Il gol d'onur da las giugadoras rumantschas è vegnì manchentà sulet per pauc. Giugar ballapè è sulet ina da las finamiras da la scuntrada organisada la fin da l'emna da l'Uniun cultura ballape rumantsch timunada da *David Flepp* e da ses consuprastants *Flurin Bundi* e *Marco*

*Cavegn*. Ch'il ballape n'è betg il sulet motiv per las scuntradas sportivas tranter las diversas minoritads han ins spert enderschi il venderdi saira a Crap Gries. Curt suenter ils giuus ha ina represchentanta da las Sorbas prendì enta maun in instrument che sumeglia ina violina. In instrument en quella furma existia sulet en tschintg variantas, han las represchen-



David Flepp, il president da l'Uniun cultura ballape rumantsch, a chaschun dal pled da bainvegni.

tantas da la minoritad sorba uriunda da l'ost da la Germania explitgà. Tar ils tuns da l'instrument e vegnì sautà sin la piazza da ballape. Suenter la tschavera e suenter avair persequità la terrada e la sortida da l'equipa brasiliana dal Campiunadi mundial da ballape han las trais gruppas envidà da degustar spezialitads culinaricas da lur patria. Il represchentant da la delegaziun ladina *Giorgio Costabiei* ha exprimi ses plaschair da l'invitaziun dals Rumantschs ed ha menziunà ils stretgs contacts tranter ils Ladins dal Tirol dal sid e la Rumantschia instradads avant diesch onns a chaschun da l'emprima Europeada. Ed ils Ladins spetgan cun plaschair sin la proxima Europeada ch'ha lieu en dus onns a Kärnten, organisada da la minoritad slovena en l'Austria. Cun diversas chanzuns accompagnadas dal chantatur *Thomas Cathomen* ha la delegaziun rumantscha embelli la scuntrada dal venderdi. Per promover la cuminanza han tuttas delegaziuns prendì dimora en l'Hotel Signina a Laax. Per ils indigens ina situaziun in pau speziala da sa chasar en in hotel en l'atgna vischinanza. Ballape è era vegnì giugà durant la sonda suenter che las equipas han pudì eleger tranter riverrafting u ina girada culturala.



Las giugadoras sorbas èn stadas in zichel memia fermas per l'equipa rumantscha.



Cumplina concentraziun durant il chant inizià da la delegaziun rumantscha accompagnada dal chantatur Thomas Cathomen.

FOTOS J. STEPHEN ED A. CADONAU



La delegaziun sorba ha envidà a sautar e fatg musica cun in instrument ordvart spezial.



Clemens Skoda, il timun da la delegaziun dals Sorbs, ha engrazià per l'invitaziun ed è satisfatg da la scuntrada cun il Ladins e Rumantschs ed ha laschà reparter in regal...



... numnadain in cudesch cun regurdanzas da la davosa Europeada.



La delegaziun sorba è vegnida accompagnada dad intgins fervents fans.